
RATA A TE

Tino aratai

E te mau taeae e tuahine here e:

Ua farii te peropheita Isaia ma te haehaa e i manuia 'i te basileia o Iuda, no ta Iehova noa ia haamaitairaa. Mai ta tatou e taio i roto te Isaia 26:12, ua papai oia: "E Iehova, . . . o ta matou atoa nei hoi mau ohipa, ua ravehia e oe no matou." Ia hi'ohia i te ohipa o tei ravehia i te roaraa o te matahiti taviniraa i mairi a'enei, papu roa ia e e parau atoa tatou i te reira. Te rave nei iho a Iehova "i te mea umerehia . . . aore a i ravehia i te fenua atoa" na mua a'e! (Exo. 34:10) A feruri na i te tahi o te mau haamaitairaa no o mai ia 'na ra ta tatou i fana'o.

Mea maitai mau te faaohiparaa o ta tatou reni Internet haamanahia jw.org. Ua hau atu i te 600 reo i teie nei i nia jw.org, e nehenehe atoa e taio e e rave mai i te mau papai na roto hau atu i te 750 reo. Mea hona te reni jw.org ei ravea no te faaite i te parau mau i te feia aau tia. A hi'o na: Aita te hoê tane faaipoipo e ta 'na vahine i tiaturi faahou i te haapaoraa no te mea e ua ite raua e mea haavarevare roa te taata i reira. A imi ai raua i te aratairaa pae varua, ua itehia ia raua ta tatou reni Internet. Haamata 'tura raua i te haere pinepine i nia jw.org no te taio i te tahi mau tumu parau no roto mai i ta tatou mau papai e no te mataitai i te mau video. Ua rave

atoa mai raua i te buka iti *E hi'opoana'e i te mau Papai i te mahana hoê* e haamata 'tura raua i te taio i te irava mahana e ta raua e piti tamarii. Tera hoi ta ratou e rave ra a patoto ai te mau Ite no Iehova i o ratou. Ite atura teie mau Ite no Iehova e maoti to ratou haereraa i nia i te reni jw.org i rave ai te utuafare e rave rahi tauiraa: tumâ i te mau tatau e tatara te mau tapea tari'a i nia i te tahi mau vahi o te tino, faarue i te mau hoho'a faaroo, faaea i te faatupu i te mau oroa a teie nei ao e i te mataitai i te mau hoho'a tano ore—ua rave na hoa faaipoipo pau-roa teie mau tauiraa hou te mau Ite no Iehova a farerei ai ia raua! I teie nei, ua riro mai te papa, te mama e hoê o na tamarii ei taata poro e te faaineine ra na hoa faaipoipo no te bapetizora.

Ua faataehia mai e rave rahi mau tapao haamaurururaa no te hoê faanahoraa ê atu: te JW Haapuroraa teata. Na roto hau atu 70 reo i teie nei te faanahoraa ava'e. E rave rahi atu a râ reo te tiaihia ra. E rave rahi utuafare o te mataitai nei i teie faanahoraa i te arui haamori-raa utuafare. Mai ta te hoê taeae i parau, "Ua rahi ta Iehova faanahoraa. Aita râ vau i piri a'enei mai tera i te pu rahi!"

E tupuraa taa ê mau no to Iehova nunaa te mau tairururaa e toru mahana. Aita e ore e tera atoa no te mau tairururaa e toru mahana tei tupu i te matahiti taviniraa 2015. E 42 video e hoho'a tei faaitehia i

te tairururaa, oia atoa na upaupa e ono nehenehe mau tei faata'ihia hou te hoê tuhaa a haamata 'i. Ua parau te hoê taeae no nia i te tairururaa, "E au ra e, i te roaraa o te porotarama, aita te taata i hinaaro faahou e tiatia, aita ratou i hinaaro ia mairi hoê noa ''e tuhaa o te porotarama." Ua tapao te hoê tuahine mitionare no nia i te tairururaa e toru mahana i te matahiti i mairi a'enei: "Na roto i te mau video, ua riro te parau mau e te Basileia ei mea mau a'e no 'u."

E haamaitairaa atoa no õ mai ia Iehova ra te mau himene apî o te Basileia ta tatou i fana'o i te matahiti i mairi a'enei. Ua papai te hoê tane e ta 'na vahine faaipoipo: "Na roto i te mau himene apî, e au ra e te tauahi mai ra Iehova. Ua tauturu mai te reira i roto e rave rahi mau taime fifi." Ua haamana'o ta tatou tairururaa e toru mahana ia tatou i te ohipa ta te püpü faata'i upaupa a te Watchtower e te püpü himene i rave no tatou ma te here. Pauroa tera mau tutavaraa, no te arue ia ia Iehova!

Ua faaohipa maitai anei ta oe amuira i te mau vairaa papai afai-fai no te pororaa i te vahi taata? Ua riro teie huru raveraa ei haamaitairaa! A tahi ra vetahi mau taata o te faaea ra i te mau vahi opanihia i te mau taata e ere ratou no reira aore ra i roto i te mau fare tahua teitei a faaroo ai no nia i te parau mau e e rave rahi, oia atoa te mau Ite no Iehova tei faaea i te haere i te mau

putuputuraa e te pororaa, te fana'o atoa nei ratou i te tauturu i te pae varua maoti teie ravea. I Tenuare 2015, i Korea apatoa, ua tapiri atu te hoê taata i te hoê vairaa papai afai-fai. Ua faataa atu oia e aita i maoro a'enei, ua haamata oia i te feruri-ruri maite i te mau ohipa pae varua. Haamata 'tura oia i te haapii i te Bibilia. I Fepuare, te taime mata-mua ia e haere ai oia i te putuputuraa. I te ava'e Mati, ua faaea oia i te puhipuhi i te avaava. I Eperera, ua haere oia e mataitai i te amaa no Korea apatoa e te tamau maitai ra oia i te haere i mua i te pae varua. Hoê noa teie o te mau faatiaraa e rave rahi tei haponohia mai i õ nei i te pu rahi.

Te pure nei matou ia tauturu te buka rairai *A ho'i mai ia Iehova ra* operehia i te tairururaa i te mau taata e rave rahi o tei tavini ia Iehova na mua ''e e tei faaea i muri iho ia ho'i mai i te Atua here, ia Iehova ra, hou a taere roa 'i. Te faaitoit nei matou ia outou paatoa ia pee i to Iehova hi'oraa ma te farii maitai i te feia o te ho'i mai ra.—Ezk. 34:16.

Ua haamaitai Iehova i to 'na nuna a i te matahiti taviniraa i mairi a'enei. E no teie matahiti? E ite mai iho â tatou. A tiai noa 'i râ, ia ite outou e te here ra matou, te Tino aratai, ia outou paatoa e te pure atoa nei no outou.

To outou mau taeae,

Tino aratai a te mau Ite no Iehova